



**TERTIB ACARA MODEL D KEBAKTIAN
MINGGUGKPS P.BULAN-RESORT
POLONIA MEDAN MINGGU 18 DOB
TRINITATIS, 19 OKT 2025**



TOPIK: “Domma Huidah Naibata”

1. Votum – Introitus – Tonggo

P : Riap ma hita jongjong!

: Ibagas goran ni Naibata Bapa, pakon Tuhan Yesus Kristus ampa Tonduy Na Pansing, Sitompa langit pakon tanoh on. Amen.

Ai huhira, sitaronon bani panorang sisonari seng satimbang in marimbang hasangapon, na sihol sipatalaron ope banta (*Rom 8:18*).

K : (Mandodingkon) Hal 303:1 (do = f) ; Na Pansing, Na Pansing,

Na Pansing, Na Pansing, Tuhan parkuasa.

Ari on hanami mamuji Naibata.

Na Pansing, Na Pansing janah marjumbalang.

Sitolusada na sangap tumang.

P : Martonggo ma hita!

Ham Tuhan Naibata parholong ni atei banggal. Ham do harohan ni apoh-apoh na tarsulur hubani halak na marpusok ni uhur, ampa gogoh na sumurung hubani halak na ibagas hagalekon. Tatap Ham ma hanami na martumpu on, ase malas uhurnami janah margogoh mandompakkon bagei ni hamaholon. Tangihon Ham ma pangindoannami on, Ham Tuhan sipangapoh, haporusan, parbansahan pakon batar-batar na toguh marhitei Jesus Kristus Tuhannami. Amen. (*hundul kuria*)

2. Mandoding Hal. No. 202. Ungkab Labah na Majenges (1-3) do = c

1. Ungkab labah na majenges rumah ni Naibatakin;

Ai hujin do au maringgas bani ari Minggu in.

Hupindahi do ijin bohi ni Naibatangkin. 2. Domma roh au Ham Tuhanku, roh ma use Ham hujon.

Ai i rumah ianan-Mu hamegahon do tongtong.

Masuk ham bai uhurhon, rumah-Mu ma in tongtong.

3. Sai hormat ma parlahouhu dompak bohi-Mu ijin.
Suruh Ham ma bai uhurhu, Tonduyumu Napansing in.
Ase sai tongtong torsa tonggo 'pa dodinghu da

3. Hasasapan ni Dousa

P : **Riap ma hita jongjong!** Martonggo ma hita, sopotkon hita ma dousanta hubani Tuhan Naibata!

Ham Tuhan Naibata, paridop ni uhur anjaha parholong ni atei hubannami jolma pardousa on. Domma ihatahon Ham hu bannami, ase ihaholongi hanami hasomannami doskon dirinami. Hape bani pargoluhannami ari-ari, gati do seng jumpah Ham in humbannami. Gati do hanami mardomdom, marsubil ronsi marmapas ni uhur dompak hasomannami. Hurang do homa hanami palumbahon hasoman, bani parlahou na hurang dompak Ham. Age kuria-Mu pe, gati do lang ihaholongi hanami humbani uhur na borsih. Gati lang marpangguruan hubani harusuh ni uhur-Mu hanami, laho mandalankon tanggungjawabnami i tongah-tongah ni kuria-Mu, gabe harusuhnami sandiri hansa idalankon hanami. Na roh do hanami hu lobei-Mu mansopotkon dousanami, holong ma atei-Mu, marpangulaki ma uhur-Mu mangidah hanami, sasap Ham ma haganup dousanami in, ibagas goran ni Anak-Mu Jesus Kristus sihopkop hanami. Amen.

P : Tangar anjaha haporsayai hita ma Hata ni Naibata, bagah-bagah pasal hasasapanni dousa.

Idop ni uhur-Ni Jahowa do na so ra marpunsa, seng marnarotap holong ni atei-Ni. Mulak ratah do ai siap sogod, banggal do habonaron-Mu. (*Tangis-tangis 3:22-23*)

P : Ibagas holong ni Naibata, domma isasap haganup dousanta. Halani ai, pataridahkon hita ma tanda-tanda ni pargoluhon na bayu. Hasangapon ma bani Naibata i babou.

P/K : Amen!. (*hundul kuria*)

4. Mandoding Hal. 237. Roh Ham bai Jesus, Roh Ham Botul (1+4) do = bes

1. Roh ham bai Jesus, roh ham botul, tangar hata-Ni jalo bujur.

Na roh do Jesus pagoluh ham, asal porsaya ham.

Malas do uhurta in use, ai borsih hun bani dousa pe;

Sai roh ma hita hu surga in, ai sonang do ijin.

4. Roh ham bai Jesus, ai holong do, uhur-Ni bani halak na roh ;
Ai ipaluah tonduyta in, ulang be magou in.
Malas do uhurta in use, ai borsih hun bani dousa pe;
Sai roh ma hita hu surga in, ai sonang do ijin

5. Mambasa Sibasaon

P: Tangar hita ma hata ni Naibata na tarsurat bani **LUKAS 18: 1-8.....** amen
Martuah do na manangar hata ni Naibata anjaha na marimbagashonsi!K:
Amen

6. Mandoding Hal. 386. Agepe Sungkod Mata Manonggor (1+3+4)

1. Agepe sukkod mata manonggor
Seng anjai sukkod, holongni Tuhanta.
Seng ipaturut, hita on tarbador,
asal tangihon hata-Ni in.

3. Pongkut martonggo, ungkab uhurmu,
sai jalo Jesus baen batar-batarmu,
Napaluahkkon ronsi namarmudu,
asal tangihon hata-Ni in.

4. Pongkut martonggo, ungkab uhurmu.
Sai jalo Jesus baen batar-batarmu.
Napaluahkon ronsi na marmudu,
asal tangihon hata-Ni in.

7. Hata Haporsayaon

P : Riap ma hita jongjong! Saksihon hita ma haporsayaonta in, songon na sinaksihonni haganup halak na porsaya i sab tanoh on.

P+K: Ahu porsaya bani Naibata Bapa, pargogoh na so tarimbang, na manompa langit pakon tanoh on.

Ahu porsaya bani Jesus Kristus, Anak ni Naibata na sasada in, in do Tuhanta, na tinubuhkon ni si Maria sanggah nape haliaban, marhitei Tonduy na Pansing, na manaron na parngit, bani panorangni si Pontius Latus, iparsilangkon, matei anjaha itanom, turun hu nagori toruh. Mulak manggoluh humbani na matei bani ari patoluhon. Naik hu surga anjaha hundul i siamun ni Naibata Bapa, pargogoh na so tarimbang in. Hunjai ma la mulak magira laho manguhumi halak na manggoluh pakon na dob matei.

Ahu porsaya bani Tonduy Na Pansing, bani Kuria parsadaan na mapansing in, parsaoan ni sagala na mapansing in, bani hasasapan ni dousa, bani parpuhoon ni angkula, pakon bani hagoluhan na sadokah ni dokahni. Amen..(hundul kuria)

8. Mandoding Hal. 327. Marpangusandeian Bani Tuhan in (1+3) do = bes

1. Marpangusandeian bani Tuhan in,
puji sai pasangap ma goran-Ni in
Monang halani hatani Tuhan in,
mangarapkon parpadanan in
Sai mangarap bani padan ni Tuhanta Jesus Kristus
Sai mangarap ma hita bai partobusan-Ni in

3. Sai dalankon horja ni Tuhanta in,
janah sai dingat ma bani padan in.
Sai sirsir martonggo na porsaya in,
Ai podas ma roh Tuhanta in.
Sai mangarap bani padan ni Tuhanta Jesus Kristus
Sai mangarap ma hita bai partobusan-Ni in

9. Tingting + Tonggo Pangapition

10. Mandoding Hal. 126. Dear ni in Panogu-Mu Jahowa (1+4)

1. Dear ni in panogu-Mu Jahowa,
bani ganup na pinarmahan-Mu
Seng anjai roh bahenon-Mu na dorsa
Seng tarponopkon Ham be bujur-Mu
Gati suhar do pambahenan-Mu
Bai uhurni na so mananda Ham
Hape halani in marrohan bei
Bai haliaron na tinobus-Mu

4. O Tuhan, sai na puji ma goran-Mu,
ai ipagoluh Ham do hanai on!
Tandaon nami ma pambahenan-Mu,
dob ipalihar Ham panonggor on.
O Naibata, holong ma uhur-Mu,
manogu hanai na ngalutan on.
Holong ma atei-Mu bannami on,
'se ondos hu Bamu bahenon-Mu.

11. *Ambilan: 1 MUSA 32: 22-32*

P : Mambasa teks iujungi ...amen

K : **Mandoding Hal.18:1**

Hata-Mu ale Tuhanku, arta siharganan ai.

Sai palongkot bai uhurhu, ulang lang hujolom ai.

Anggo seng be sijoloman, Hata na madear in.

Aha ma na baen onjolan, ni haporsayaonkin.

P : Marambilan....amen

K : **Mandoding Hal. 332:1**

Hata-Mu ale Tuhan, ondos ma bai uhurhon.

Sai margogoh ma tongon, pabayuhon goluhkon.

Sai patotap uhurhon, mambalosi Ham tongtong.

Sadokah ni goluhkon, hupasangap Ham tongtong.

P : Tonggo dob Ambilan

12. *Manggalang*

P: Paima iondoskon hita galanganta, tangar hita ma lobei hata ni Naibata na gabe onjolan banta laho manggalang aima na tarsurat bani **1 Kronika 29:14: “Ai ise ma ahu, anjaha aha ma bangsangkin, ase boi hanami margugu humbani nionjar ni uhur sonin? Ai marharorohan hun Bamu do ganup, anjaha na humbani tangan-Mu in do na binnerenami in Bamu”**. Sonari ondoskon hita ma galanganta!
(diiringimusik/doding)

Diatei Tupa ma (Betapa Hatiku)

*Diatei tupa ma
sombahku hu Bamu Jesus
Halani holong-Mu,
Ham parsimada au*

Ref:

*Huboan hu Bamu, daging ‘pa tonduyhin
Na gabe galangan, parsombahan Bamu
Ai lang tarbahen au, na patut hu Bamu
Ai pitah on Tuhan, na targalangkon au*

*Hupindo hu Bamu, sai holong atei-Mu
Sai jalo Ham Tuhan, galanganku on
Sai pake Ham ma au, gabe parugas-Mu
Sadokah goluhkon*

13. *Tonggo Panutup/Pasu-pasu*

P : Riap ma hita jongjong!

Martonggo ma hita mangondoskon galanganta hubani Naibata:

Ham Tuhan Naibata Bapanami, harohan ni haganup. Hun Bamu do harohan ni pasu-pasu hu bannami. Ibere Ham do bannami goluh ampa hagoluhan ari-ari. Ham Tuhan, ijon iondoskon hanami do hu Bamu goluh pakon pasu-pasu na dob binere-Mu in bannami. Sai lambin margogoh ma tongon hanami ihasomani idop ni uhur-Mu ampa pasu-pasu-Mu bani na mandalankon horjanami. Papansing Ham ma galangan na ginalangkonnami on gabe galangan na misbou i lobei-lobei-Mu, ase lambin ihargahon hanami tongon dear ni layak pakon pasu-pasu-Mu in marhitei na pasaudhon harosuh-Mu humbani gogoh, pingkiran ampa sinadongannami. Tarima kasih ma Bamu Tuhan. Marhitei Kristus Jesus Tuhannami, jalo Ham ma galangan pakon tonggonami on. Amen.

P/K : (Mandodingkon) Halleluya 383:1 (do=as)

1. Marhitei diatei tupa roh do au Tuhan

Mamboban buah ni horja na binereMu

Jesus, Jesus, jalo Ham ma au

Bai hurangni panurdukhu anju Ham ma au

14. *Tonggo Ham Bapa Nami*

P. Ham Bapanami na i nagori atas. Sai na papansing ma goran-Mu. Sai roh ma harajaon-Mu. Sai saud ma harosuh ni uhur-Mu i nagori tongah on songon na i nagori atas. Bere Ham ma bannami sadari on hagoluhan ari-ari. Sasap Ham ma dousanami songon panasapnami bani dousa ni hasoman na mardousa dompak hanami. Ulang hanami bobai Ham hu parlajouan. Paluah Ham ma hanami humbani pangagou.

K. (*mandodingkon*) Ai Ham do simada harajaon, pakon hagogohon, ampa hasangapon sadokah ni dokahni. Amen.

BE-841, AI HAM DO SIMADA HARAJAON

Es = Do
4 / 4

S 1 | 1 . 3 4 | 5 5 3 4 | 5 . 5 .
A 5 6 . 1 1 | 2 5 4 3 2 1 | 7 1 2 1 7 1 .
T 3 3 . 6 6 | 7 1 7 5 8 6 | 2 3 4 3 2 3 .
B 1 6 . 6 5 4 3 2 | 5 4 3 2 1 7 6 2 | 5 . 1 .
Ai Ham do si ma da ha ra ja on
Kar - na Eng - kau pu - nya ke - ra - ja - an,

S 5 5 5 5 | 1 . 5 . | 5 5 5 5
A 3 4 5 1 7 1 2 7 | 1 3 4 6 5 . | 3 4 5 3
T 1 7 6 7 6 5 1 5 2 3 4 2 | 3 5 6 7 1 2 3 . | 1 7 6 7 6 5 1 5 6 8 5
B 1 2 3 5 | 1 . 1 . | 1 2 3 1
Pa kon ha go go hon am pa ha sa
dan ke - ku - a - sa - an, dan ke - mu - li -

S 6 . 3 3 | 4 4 4 4 | 3 . 1 . | 2 . . | 1 . .
A 1 2 1 7 7 | 2 2 2 7 | 1 . 6 . | 6 . 7 | 5 . .
T 6 4 8 6 6 6 5 5 | 5 . 3 . | 4 . . | 3 . .
B 4 2 3 6 | 2 1 7 5 | 1 2 1 7 6 5 4 3 | 2 . 3 4 5 | 1 . .
nga pon sa do kah ni do kah ni A A
a - an, sam-pai sla - ma la - ma - nya, A - men.

15. Paingkatkon

P. Laho ma nasiam, janah “Hupabangkit do hanima, ase laho hanima marbuah, anjahaase totap buahnima ai, ase ibere bannima sagala sipindoonnima humbani Bapa in marhitei goran-Ku” (*Johannes 15:16*)

16. Pasu-pasu

P. Jalo ham (hita) ma pasu-pasu humbani Tuhan Naibatanta:

Ipasu-pasu anjaha iparorot Tuhan Naibata ma ham (hita). Isondangkon Tuhan Naibata ma bohi-Ni hu bamu (hu banta) janah maidop ma uhur-Ni mangidah ham (hita). Idompakkon Tuhan Naibata ma bohi-Ni hu bamu (hu banta) janah ipasorap ma damei-Ni bani tonduyumu (tonduyta bei). Amen.

P+K. Amen, Amen, Amen!. (mandodingkon)